

1593 *ribus copiis obsistendum potius est : id quam difficile sit , nemo ignorat ; atque ut comparari ejusmodi exercitus possit , quis vel militari prudentia ac virtute insignis , vel in gerenda republica parum exercitatus ambiguo certaminis eventu de toto imperio dimicandum suadeat ? Una igitur tantum tutelae ratio superest , ut munimento aliquo hostium impetus retardentur ac reprimantur . Ecquis erit , qui , cum de nova hac arce agetur , non ad eam omni conatu servandam accurrat ? Omnes , qui vestro parent imperio , ultro accedent , cum ex eo munimento agros , fortunas , uxores , filios pendere noverint : nemo etiam erit in ampla hac civitate patricius , nemo civis , plebejus nemo , qui pro ea arma induenda non existimet , seque vitam ipsam pro domicilio ac patria effundere non arbitretur . Nullus demum in Italia Princeps , qui , rumore tantum de illius oppugnatione dissipato , non excitetur , secumque in ejus incolumitate rem propriam agi existimans , ad commune veluti incendium extinguendum non accurrat . Quid ? quod istius tantum propugnaculi fama permotus veritusque hostis , ne , quantum equitatus ac peditatus gignit atque alit Italia , in ejus perniciem convertatur , de ea invadenda consilia abjiciet ; atque ita cum immortalis Veneti nominis gloria impervim in hanc provinciam iter , pernobilis hoc erecto propugnaculo , evadet ? Cur igitur , praestantissimi Patres , cunctamur ? cur ambabus ulnis salutare hoc Senatus consultum non amplectimur , tot undique utilitatibus refertum , ut non humano solum consilio , sed natura ipsa magistra incitari videamur , quae cunctorum quamvis exilium animantium ingenia egregie ad propriam salutem armavit ac instruxit ? An potentissimi hostis , qui in dies viribus auctus , nova molitur , progressus expectabimus ? permittemusque , ut inutili hac mora neque querelis in posterum , neque poenitentiae locus sit ? In vobis situm est , Patres , Carnos tutos reddere , immo , quid Carnos dicam ? Venetam omnem regionem , florentissimas vestras Galliae Cisalpinæ urbes , hanc inclitam civitatem , Republicæ domicilium , Italiam ipsam , atque , ut uno verbo dicam , universam christianam rempublicam tutam incolumemque servare . Vobis , vobis , inquam , id summa Dei Optimi Maximi benignitate concessum est , quod olim Romanae reipublicæ proprium fuit ,*